

Nunatta Qitornai

Inatsisartuni



04.april 2019

UPA2019/112

Inuit ernumanermik isummakkullu nanertisimanermik eqqugaasartut isumassorneqarluarnissaat qulakkeerniarlugu nuna tamakkerlugu iliuusissatut pilersaarummik kingusinnerpaamik UPA2020-mi saqqummiunneqartussamik Naalakkersuisut suliaqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Aleqa Hammond, Nunatta Qitornai)

Nunani avannarlerni killerni siornaanngorpoq tarnikkut peqqissuuneq pillugu immikkut sammisaqartoqarluni isumasiortitsisoqarmat peqataanikuuvunga, tassanilu immikkut tarnik pissusaanik ilisimasalinnik siulittutigineqarpoq ukiuni aggersuni nappaassuaq atuunnerpaanngortussasoq tassa tarnikkut nappaateqarneq. Inooriaatsip allanngoriartupiloornera, ilaqtariit inuillu ataasiakkaat angumersiniaanerujussuarmik tunngaveqartumik inuulernerat, piumasaqaatit inummut ataatsimut annertusiartortut, suliffinni angummanniarneq annertusiartortoq, meeqqat soqutigisai amerlillutik orniguffissarpasuit, inersimasut sulereernerup kingorna allarpassuarnik angumersiniartarnerat inummut ataasiakkaamut tarnikkut imminut naammangiunnaariartornermik nukissaaruffijartornermillu nassataqarnerata kingorna napparsimalersinnaaneq oqaatigineqarpoq.

Eqqarsalersitsivoq assut. Utimut eqqarsariartitsivoq qanoq meeraavugut maannalu qanoq inuuvugut. Isumaqarpugut ullutsinnut inuunerput siuliani inuunermit allaaneroqaaq aamma maannakkut tusartalerpavut uippakkajaalernermik eqqorneqartut amerliartortut aammalu taaqqunganermik napparsimalersartut amerliartortut. Taamatut aqquaagaqartut atugaqartullu tamakkiisumik inuiaqatigiinni akuusinnaanerat killeqalersarpoq imminullu isumaginiarnerat sivisoorsuarmik ajoqusiisinnaalluni.

Taamaammat innuttaasumut ataatsimut peqqissusaanik siuarsaniarnermi avaqqunneqarsinnaangilaq suliniutit tarnikkut anersaakkullu peqqissumik inuunissamut aqqtissat erseqqissuunissai peqataaffigineqarnissaallu.

Angerlarsimaffitsinni inuunerput qanoq isumaqarfigaarput, qanoq pilersaaruteqarfigaarput, meerartavut qanoq sunnerpavut, suliffinni qanoq kivitsisinnaassusera aammalu angummassinnaassusera inissismava aammalu siunissamut qanoq inoorusuppunga. Tamakkuupput apeqqutit tamarmik inuunitsinni nammineq akisussaaffigalugit iliuuseqarfingisinnaasavut qulakkeerinneqataallatalu peqqinnerusumik imminut paaraluta inuunissatsinnut.

Nunatta Qitornai

Inatsisartuni



Pinaveersaartitsineq pingaaruteqaqaaq. Suliffeqarfinni erseqqissumik uippakkajaarnermik eqqungaangninnissaq anguniarlugu sulisunut politikkqeinqarnissaq pingaaruteqaqaaq inooqatigiinnitsinnilu immitsinnut isigaluta ikorfartueqatigiinnissaq tusaanissarlu pingaaruteqaqaaq. Imminut naalaarneq siusissumillu iliuuseqarneq aqqutissaavoq.

Naalakkersuisut innuttaasut peqqissuunissaannut suliniutaat ingerlasoq assorsuaq innutaasuni peqataaffigineqartartoq Inuuneritta pitsaavoq, tulluarsarneqartuarpoq pisunut unammilligassanullu immikkut sammisaqartarluni soorlu aamma maannamut taamaattoq. Pinaveersaartitsinermi sulinermi sakkussat pingarnerit ilagaat aammalu soorunami peqqinnissaqarfimmi sulisutta suliaq angisoorsuaq kivippaat atukkat taama ittut katsorsarniarlugit pinaveersaartinniarlugillu – soorlu aamma siunnersuuteqartup suliakkiutigiumasai ilanngullugit.

Maannamut nuna tamakkerlugu suliniutaasut pitsaalluinnartutut nalilerpavut taamaattumik siunnersuuteqartup siunnersuutaa tapersinngilarput.